

Bouxbing Duivuj Swnjcienz Vwnz-va Fwencuengh——Liu Yinjbangh

传承壮欢文化的退伍军人——廖引帮

□ Liu Bwnjvei Vangz Yungj/廖本惠 黄勇

“Bouxbing doiqvuj Liu Yinjbangh, bang-coengh hoihfwen caen daihfueg, Majbingz bingz baenz mbanj Fwencuengh, goenglauz Yinjbangh mbouj ndaej lumz.” Youq aen mbanj ndaej bingz baenz “Mbanj Fwencuengh Guengjsae” Sieng-couh Yen Majbingz Cin haenx, moix baez miz vunz daez hwnj bouxbing doiqvuj Liu Yinjbangh, couh haengj yungh hot fwen baihgwnz ciengq haenh de. Aenvih haengj eu Fwencuengh, caiq cienzsim cienzeiq swnjcienz feihvuzciz vwnzva yizcanj Fwencuengh, Liu Yinjbangh ndaej bingz baenz Fwencuengh yenzgiuhvei veicangj Majbingz Cin, caiq ndaej souh’iu camgya aen hoihung Laizbinh Vwnzlenz Daibyauj, aeundaej aen cwnghauh ndei “Fwenvuengz Guengjsae”. De doiq gij vwnzva Fwencuengh gig yiedsim, ciensim guh boux swnjcienz Fwencuengh ndeu, gonqlaeng ndaej Guengjsae Densidaiz, Laizbinh Densidaiz daengj sinhvwnz danhvei caijfangj baudauj lai baez.

Liu Yinjbangh 1957 nienz seng, de daj iq couh souh vwnzva Fwencuengh yingjyangj, 1979 nienz daengz 1983 nienz 11 nyied, Liu Yinjbangh souh guekgya haucau, haeuj ginhdui guh bing, bienqbaenz boux bing benhfanz budui ndeu. Aenvih de youq ndaw budui gaenx hag buek lienh, gvaq mbouj nanz, de couh ndaej dang daengz banhcangj lo, vanzlij camgya le ciengzciengq swvei fanjgiz. Doiqvuj dauqma mbanjranz le, de guh lauxsae daiqgoq gvaq, gvaqlaeng caiq guh seng’eiq. De dawz gij cingsaenz gaenx guh, buek guh, mbeihung youq ndaw budui lienh baenz haenx, yungh daengz guh seng’eiq ndawde, doenggvaq sawqlienh nem yunghsim roengzrengz guh sengeiq, de ginghyingz baenz aen diemqgwnngaiz cawj nohyiengz ndeu, cauh’ok aen binjbaiz Majbingz “Nohyiengz Raemxsaw”, gonqlaeng youq haj aen yienh henzgyawj hai guh le faendiemq, caiq roengzngaenz haiguh diemqgwnngaiz, hawciengz nungzmou daengj lai cungj hangznieb. Mbouj-

lwnh de guh gijmaz hangznieb, guh gijmaz hong, de cungj genhciz eu Fwencuengh, caenh swheij naengzlig coicaenh hwnghat vwnzva Fwencuengh.

Liu Yinjbangh dwg boux youq Mbanjcuengh doekseng, youq Mbanjcuengh majhung ndeu, de daj iq couh haengj yungh Vahcuengh daeuj eu fwen. Youq ndaw Majbingz Cin, yungh Vahcuengh eu fwen miz lizsij haj bak lai bi lo, Fwencuengh dwg cungj fwen caeuq fwen diegwnq mbouj doengz he, de yaemlwd ndeidingq, yaemsak naeknwd, doengsug genjdanh, caenciet gamjdoengh, dwg cungj vwnzva daegbied Mbanjcuengh Guengjsae ndeu. 1986 nienz, Guengjsae Bouxcuengh Swcigh vwnzva bumwnz haivat Fwencuengh gij vwnzva daegbied neix, hix souloeg haeuj yenci bae, 2008 nienz caiq ndaej senj haeuj swcigh feihvuzciz vwnzva yizcanj baujhoh mingzloeg. Liu Yinjbangh daj iq couh eu fwen, ndigah de cibfaen yawjnaek baujhoh Fwencuengh gij vwnzva daegbied neix, caemhcai q yawjnaek swnjcienz nem hwnghat aen vwnzva yizcanj neix.

2006 nienz, Liu Yinjbangh vih daeglwg de gawjbanh vaenlaex seiz, de cienmonz ciuq gij fungsug gietvaen Bouxcuengh haenx gawjhenz vaenlaex, yungh civaiz bae cieq bawxmoq, eu Fwencuengh ciepcan soengqcaen, cingj cangh-fwen daeuj daengz yienhciegz eu fwen Laengzdou, fwen raixcaz, fwen gingqlaeuj, vaenlaex yienhciegz dauqcawq miz sing fwen, nauhyied raixcaix. Gij guhfap Liu Yinjbangh maj Fwencuengh, gaenxmaenx swnjcienz Fwencuengh, ciuyinx le Guengjsae Densidaiz nem Gveicungh Densidaiz caijfangj baudauj, caemhcai miz haujai sezyingiyah daeuj ingjsiengq, caiq guh baenz le aen ciendaenzben ndeu.

Liu Yinjbangh guh seng’eiq fatcaiz baenz-fouq le, engqgya yawjnaek hwnghat vwnzva Fwencuengh. Vihle hawj feihvuzciz vwnzva

yizcanj——Fwencuengh ndaej swnjcienz nem hwnghat, moix bi de dawz ok it daengz song fanh maenz ngaenz, gawjbanh hoihfwen Fwencuengh, miz seiz gij ngaenz banh hoihfwen mbouj gaeuq le, de couh cimh gyoengqvunz fouqmiz he ok ngaenz bangcoengh guh, moix bi cungj comz ndaej haj fanh lai maenz haiguh hoihfwen Fwencuengh doxdax. Linghvaih, moix bi ciethciq cienzdoengj Bouxcuengh —— sam nyied sam, bat nyied cibngux, ciet gouj nyied gouj cungzyiengz, ndwencieng seiz, de cungj cujciq haiguh hoihfwen Fwencuengh. Moix baez gawjbanh aen hozdung neix, de cungj caenndang senj ciengzdieg, ndacang hoihciegz, couzcomz ngaenzcienz, fat dunghcih, cimh bingzveij, hix swheij ok it fanh maenz cawx yaemyiengj, ingjsiengq, guhbaenz gvandhez fat hawj doenghboux haengj Fwencuengh haenx. Cibgeij bi daeuj, de doiq swnjcienz nem hwnghat vwnzva Fwencuengh guh le haujai saeh ok le haujai rengz.

Aenvih bouxbing doiqvuj Liu Yinjbangh cienzsim cienzeiq guh saeh swnjcienz nem hwnghat vwnzva Fwencuengh, 2013 nienz Majbingz Cin ndaej swcigh hawj aen cwnghauh ndei “Mbanj Fwencuengh”, Majbingz Cin caemh ok le sam boux fwenvuengz Guengjsae, boux vunz swnjcienz Fwencuengh ndeu, canghfwen caemh daj gaxgonq samcib geij vunz demlai daengz seizneix miz sam bak lai boux lo. Aenvih gij cingzgvang yienghneix, Majbingz Cin laebbaenz le aen Fwencuengh Yenzgiuhvei ndeu, Liu Yinjbangh ndaej senj dang veicangj, cauhaeb le aen ghidi swnjcienz Fwencuengh ndeu. De doenggvaq hwnghuengh vwnzva Fwencuengh, gij ginghci Majbingz Cin ndaej hwnghat, cauh ok le gij vanzging yinzvwnz gyaunde, caiq deng Yinzminz Yizbau baudauj seiz haenh baenz boux doiq coicaenh hong swnjcienz nem hwnghat vwnzva Fwencuengh miz goenglauz hungmbwk ndeu.



▲ Fwenvuengz doxdax yienhciegz (doz swliu).

◀ Liu Yinjbangh (boux baihgva).



▲ Liu Yinjbangh (boux baihgva) daengz aen baiz “Mbanj Fwencuengh”.